



Broj: 05-1-50-2-761-4/19
Sarajevo, 17.09.2020. godine

Na osnovu člana 18. Poslovnika Centralne izborne komisije Bosne i Hercegovine („Službeni glasnik BiH”, br. 29/18 i 25/20), a u vezi člana 13. Zakona o ravnopravnosti spolova u Bosni i Hercegovini („Službeni glasnik BiH”, broj 32/10) i člana 86a. Zakona o radu u institucijama Bosne i Hercegovine („Službeni glasnik BiH”, br. 26/04,7/05,48/05,60/10, 32/13 i 93/17), Centralna izborna komisija Bosne i Hercegovine je na 55. sjednici, održanoj 17.09.2020. godine, donijela

ODLUKU

o politici nulte tolerancije prema djelima seksualnog uznemiravanja i uznemiravanja na osnovu spola na radnom mjestu u Centralnoj izbornoj komisiji Bosne i Hercegovine

Član 1. (Predmet)

- (1) Centralna izborna komisija Bosne i Hercegovine je opredijeljena da osigura radnu sredinu bez seksualnog uznemiravanja i uznemiravanja na osnovu spola za sva lica.
- (2) Niko nema pravo da seksualno uznemirava ili uznemirava na osnovu spola bilo koje lice na radnom mjestu i u vezi sa radom.

Član 2. (Posebna prava i obaveze)

Odredba iz člana 1. stav (2) ove odluke se posebno odnosi na:

- a) pravo na radnu sredinu bez seksualnog uznemiravanja i uznemiravanja na osnovu spola;
- b) obavezu reagovanja kada su druga lica žrtve seksualnog uznemiravanja i uznemiravanja na osnovu spola;
- c) obavezu prijavljivanja seksualnog uznemiravanja i uznemiravanja na osnovu spola i
- d) pravo na povjerljivost podataka disciplinskog postupka.

Član 3. (Zabrane)

(1) Seksualno uznemiravanje i uznemiravanje na osnovu spola su zabranjeni zakonima Bosne i Hercegovine, kojim je utvrđeno da seksualno uznemiravanje i uznemiravanje na osnovu spola postoji kada se radi o ponašanju koje je:

- a) neželjeno - sva ponašanja na radnom mjestu koja su seksualne prirode ili se odnose na neprimjerena ponašanja usmjerena prema licima zbog njihovog spola,
- b) verbalno - odnosi se na riječi, odnosno zvuke, kao što su šale, pitanja, primjedbe, a mogu se iskazati usmenim ili pisanim putem,
- c) neverbalno - obuhvata sve gestikulacije i ponašanja koja nisu obuhvaćena riječima, tj. izraz lica, pokrete tijelom ili davanje znakova,

- d) neprimjereno fizičko ponašanje je svako seksualno ponašanje koje uključuje kontakt s tijelom drugog lica,
- e) seksualne prirode je uznemiravanje zbog spolnih (vanjskih, fizičkih ili bioloških) karakteristika muškog odnosno ženskog spola koje se mogu prepoznati u seksualnim ponudama, ucjenama ili čak povredama tjelesnog integriteta, a obuhvata razne uvrede seksualne naravi, dobacivanja i insinuuacije seksualnog karaktera, komentare o fizičkim obilježjima seksualne prirode ili o seksualnom životu lica itd,
- f) na osnovu spola je ponašanje koje omalovažava tj. ponižava lice u njegovom svojstvu pripadnice ili pripadnika muškog ili ženskog spola (manje vrijedne ili manje sposobne) i
- g) zastrašujuće, neprijateljsko, degradirajuće, ponižavajuće ili uvredljivo ili kojim se postiže takav učinak.

Član 4. (Mjere)

Centralna izborna komisija Bosne i Hercegovine će poduzeti sve mjere utvrđene pozitivnim propisima kako bi se ispitala sve okolnosti vezane za seksualno uznemiravanje i uznemiravanje na osnovu spola na radu i u radnim odnosima, te će osigurati da lice koje prijavi ova djela neće trpiti posljedice zbog te činjenice.

Član 5. (Zahtjev/prijava za pokretanje disciplinskog postupka)

Zaposleni/zaposlena ima pravo da podnese zahtjev/prijavu za pokretanje disciplinskog postupka u skladu sa važećim propisima, ukoliko smatra da je seksualno uznemiravan/a i uznemiravan/a na osnovu spola.

Član 6. (Imenovanje savjetnika/savjetnice)

Centralna izborna komisije Bosne i Hercegovine će posebnom odlukom imenovati savjetnika/savjetnicu i zamjenike savjetnika/savjetnice za prevenciju uznemiravanja na osnovu spola i seksualnog uznemiravanja na radnom mjestu u Centralnoj izornoj komisiji Bosne i Hercegovine.

Član 7. (Stupanje na snagu i objava)

Ova odluka stupa na snagu danom donošenja i objavit će se na internet-stranici Centralne izborne komisije BiH www.izbori.ba.


Predsjednik
Zeljko Bakalar
Zeljko Bakalar